



17570

kat.komp.

I

Mag. St. Dr.

P

annes

Icon heroicae virtutis.

PANEG. et VITAE

Polon. 4^a

Nr. 156.

Biblioteka Jagiellońska



stdr0002127

J C O N
HEROICÆ VIRTVTIS,

Generoso ac Magnanimo Iuueni,
PERILLVSTRIS AC MAGNIFICI
DOMINI,

D. FRANCISCI à DEMBIANY
DEMBIENSKI,
Vexilliferi Terræ Cracouiē. &c. &c.

INCLYTO FILIO,
IOANNI DEMBIENSKI,
auiæ paternæque gloriæ hæredi fæliciss.

D V M

Excellentiss. & Adm. Rnd^o D. Matthæus Casimirus
Woiászowic, Artium & Philosoph. Doctor, Paro-
chus Gremboszouiē. Præbend. q; primum
Deo Opt. Max; offerret Missæ Sa-
crificium,

A

M. IOANNE CYNERSKI RACHTAMOVIO, Coll.
Min: Ord. Eloq. Profess. debita gratulationis ergò, d. c. q.

CRAC. In Officina Francisci, Cæsarij. A. Dñi 1639.

PP. I 5 10



BIBLIOTHECA UNIV.




JAGELLONICAE

175705

Quid Virgo rigida tergo supereminet Vrſa ?
 Hoc vidtrix pietas porrigit auxilium
 O dulci quoties Patriæ DEMBIENSCIA virtus,
 Immanes Moschos flexit in obsequium!
 Rumpe moras Iuuenis fortunatiſſime, auitâ
 Tu pietate potent, tutus ubiq; manes.

Franciſcus Ceſariuſ;
 Sind: Eloqu.



ICON

HEROICÆ VIRTVTIS.



Vandoquidem in hoc nobilissimo le-
ctissimorum Hospitum confluxu, pri-
mam eamque gratissimam Deo Opt;
Max: obtulit hostiam, Præceptor
Tuus longè fauentissimus Generose
ac Magnanime IOANNES; non pos-
sum illi tantâ fælicitatem, tamq; piam
& auspicatam honoris accessiõẽ, intimo ex animo non
congratulari. Est enim hæc, quam consecutus est ille
dignitas, terris augustior, Cælo sublimior, beatis illis &
à corpore abiunctis mentibus, diuinior: quam & Deus
ipse gloriosus, amplissimis beneficijs ornauit, & ab ho-
minibus vt in æximia veneratione haberetur sanctissime
fanciuit. Nec verò quisquam aliter arbitrari potest,
nisi ita impius sit, vt nullam vim cælestem, Numenve
Diuinum existimet; quem neque veræ Religionis au-
toritas, neque cælestium mysteriorum sanctitas, nec
Cæli signorumque motus, nec vicissitudines rerum at-

que ordines moueant; neq; ipse denique communis
orbis populorumq; consensus, qui sacra, qui ritus, qui
ceremonias, & ipsi sacrosanctas habuerunt, & omnibus
suis posteris, tanquam per manus colendas & obseruan-
das transmiserunt. Nam quo ad longissimè potest
mens mea respicere, spatia antecedentium sæculorum,
& antiquitatis memoriam recordari intimam, inde vs-
que repetens, video in Sacerdotum dignitate, ac hono-
re amplificando Reges, Principes, Imperatores, opti-
marum legum, & pietatis studiosissimos, plurimum sem-
per laborasse. Quamobrem Magnifici Tui Parentis,
& in capiendo consilio diligentiam, & in collocando
beneficio iudicium, quis non admiretur? qui id mu-
nus, quod quidem habebat charissimum, ardentissi-
ma voluntate, animo promptissimo, fauore summo,
huic vni potissimum, contulit Tuo Præceptori; quo
non illum solum tanto præmio pro laboribus amplissi-
mis dignissimum iudicauit, sed etiam Tibi certissimum
monstrauit modum, quo honorandus esset Præceptor
Tuus, & Sacerdos. Sic enim ille Deo clementissimo an-
nuente, iustus vtriusque possessor est honoris: vt Tu
tandem sis Nobilissime IOANNES, officij vtriusque
particeps, atque hæres benedictionis. In hac igitur
communi amicorum lætitia, & Hospitum gratissimo-
rum applausu, ICONEM Hæroicæ Virtutis, Tibi po-
tissimum offerendum esse putavi: vel vt Te Maiorum
Tuorum Magnificique Tui Parentis, tot ac tantarum
cogita-

cogitatio virtutum teneat (quarum Tu simillimam in
Te imaginem effingere debes conari) vel vt ea comme-
moratione rerum gestarum, animum Tibi meum pro-
pensum & candidum declarare possim. Quo quidem
Tibi munere, nullum neq; gloriosius, ad generis digni-
tatem, neq; fructuosius, ad præsentium studiorum ra-
tionem, potest contingere. Neque verò suspicionem
assentationis apud Te, sed occasionem quærere veritatis:
neq; ostentationis crimen apud Hospites Clarissimos,
cùm DE MBI ENSCIANAM, deprædico pietatem exti-
mesco. Antiqua enim hæc Vestræ Nobilissimæ Gen-
tis, & à prima origine deducta hæreditas est; antiquum
Ius Iustitiæ, Fidei, Religionis, boniq; publici promo-
uendi: antiqua gloria rectè factis non intumescere, nec
aculeis inuidiæ commoueri. Viguit hæc indoles in
Maioribus Vestris, præstantissimis illis, & omni laude
Clarissimis Heroibus; viget etiamnum in Magnifico
Parente Tuò; in Te quoque vt par est vigebit, & in
dies, maiora & pulchriora simul cum ætate maturiori,
accipiet incrementa. Talis nimirum sis Magnanime
IOANNES, qualis maximè cupis videri; vt quanto
Maiorum Tuorum meritis illustrior es, quanto ab o-
mni fumo fucoque vanitatis remotior: tantò sis Indole
generosior, tantò imitatione virtutum clarissimarum
studiosior: cum probè scias omnem simulationem non
esse diuturnam. Lyfander ille Cyrum Regem, & eius
pleraque omnia contemplatus hospes, felicem excla-

mauit, cuius Virtuti fortuna coniuncta esset: porro
ego beatum Te dixero, cuius indoli, non ista nescio
quæ fortuna, sed hoc tam augustum nomen virtutis,
cum sanguine simul insitum est. Vbi sincerae Religio-
nis reperitur candor, vsu publico, & maximis rerum
experimentis innutritus, non ibi veræ prosperitati, po-
tuit locus non adesse. Omnia illic tranquilla vt repe-
riantur est necesse, omnia quieta, omnia intimæ solidæ-
que plena voluptatis; adeo vt etiam possessiones am-
plissimæ, fluxorumq; bonorum abundantia (in qua
summam imperitum vulgus fælicitatem collocat) ne-
quaquam illi possit præponi, tantum abest comparari.
Pietas est basis fælicitatis humanæ, pietas singulare re-
bus in aduersis perfugium, in periculis asyllum, in pro-
speris successibus certissimum fundamentum. Hac
florent integerrimæ Resp. prosperrimè, pax seruatur
gratissima diutissimè, grauissima bella conficiuntur fæ-
licissimè, victoriæ denique gloriosissimæ, & trophæa
pulcherrima facillimè statuuntur & parantur. Cogita,
& mente circumspice Suauis. IOANNES, quantus sit
Maiorum Tuorum splendor, ob ingentem animi ma-
gnitudinem, quanta laus, ob eximiam in rebus
agendis prudentiam, quantum ob flexanimam eloquē-
tiam decus: verumtamen primas sibi partes ubiq; ven-
dicat & exposcit Candor, probitas, Religio, fides. Ne-
que enim veri libertatis propugnatores, neq; satis pro-
bati legum vindices, neq; omnino fortes, & magnani-
mi Pa-

mi Patriæ defensores, bonique communis, tam prouidi & fideles custodes, Maiores illi Vestri fuissent, nisi sacrosanctam Catholicam Religionem, in omnibus Reip. negotijs ducem habuissent auspicatam. Vellem equidem scientiam rei militaris, fortitudinem, felicitatem, cæterasq; illustres Maiorum Tuorum prædicare virtutes, quibus foris hostibus terribiles, domi Ciuib⁹ amabiles, in subitis casibus vtilis & expetendi, ubique grati & suspiciendi ac gloriosi fuerunt; at quis aut lucis clarissimæ splendorem augere, aut præstantissimæ Domus Tuæ, excellentissima facinora, exiguis artis verborumque cancellis circumscribere potest? Quod sæculum, quæ fuit vnquam ætas, non plena laborum, non plena meritorum, non plena gloriæ *Dembienſiorum*, non plena bonæ famæ? cuius lux insuperabilis, non solum Orbem nostrum Sarmaticum, sed etiam vicinas gentes ac nationes illustrauit! Quæ verò posteritas tam ingrata fuerit, vt impia obliuione sepelire possit illos *Bernardos, Petros, Iacobos, DEMBIENSCIOS*, illustri virtute, consilio, auctoritate, præstantissimos Patriæ Ciues? Quis satis cumulatè & luculenter prædicare poterit aureum illud os, illam Sarmatiæ flexanimam Suadam; VALENTINO DEMBIENSKI diuinitus instillatam? quam per omnes gradus honorum amplissimorum in Rep. Polona circumduxit: atque dum esset *Supremus Thesaurarius, & Summus Cancellarius Regni, & Castellanus tandem Cracouiën.* dubijs & asperis in rebus

rebus magnificè, fideliterque comprobauit? Toties ille grauissimus Orator, velut alter *Pericles*, pro legibus, pro libertate, pro communi bono propugnando & promouendo, in Comitijs, & Senatu Polono, ita feruenter & animosè tonabat, fulgurabat, fulminabat, vt omnis eius Oratio, etiamnum, in mutis illis literarum monumentis, ingentem legentibus pariat admirationem & stuporem. Vide, & quam diligentissimè perpende, disertissimum nostrum *Roxolanum Orzechouium* in annalibus; vt intelligas, quanta vis verborum, quod genus Orationis & facultas, quod sententiarum pondus, quæ denique consilia, eloquentissimorum Virorum, in illo maximo totius Poloniae conuentu apud *Leopolim* de Rep. habito fuerint; profectò non dubitabis affirmare, nostram illo tempore *Sarmatiam*, gloriosum illud *X. Oratorum Græcorum* (quod *Plutarchus* tantopere suspicit) Concilium, & maiestate virorum, & Orationis copia, & rerum dignitate omnino superasse. Retinuerunt hæreditarias postea Clarissimi & eloquentissimi Patris virtutes, non degeneres Filij, *Iacobus Czorstineñ. Stanislaus Chęćineñ. Andreas, & Ioannes Luboñ.* Capitanei: retinuit *Erasmus Venerab. Cap. Cracouien.* Decanus, Eloquentiæ vim atq; grauitatem, quam in Legationibus ad externos Principes reddidit illustriorem. Quis illius Senatoris cognationes & affinitates, cum Illustrissimis Familijs, *Saphranciorum, Gotschouiorum, Lanckoroniorum, Bużiniorum, Sielni-*

Sielniciorum, Reiorum, longa feliciq^{ue} serie, in filiis & filiabus satis fæliciter recensent propagatas? Quis *Iacobo Dembienſcio* in hoc districtu Cracouien. morum grauitate, candore, consilio præstantior? quis *Nicolao & Sebastiano* duobus intimis Fratribus, pietate, Ciuium optimorum amore, & familiaritate fælicior? Quod si hæc Togæ pacisq^{ue}; satis intelligis illustria fuisse ornamenta, illaq^{ue} cruenti Martis decora desideras, quibus Polonum nomen illustratum est, inspicelonge lateq^{ue} patentes crudorum Moschorum regiones, illasq^{ue} gentes locis dissitas, multitudine infinitas, moribus barbaras contemplare, atque adeò numerosa prælia si potes acerrima, congere victorias nobilissimas, collige spolia opima, trophæa pulcherrima, quæ *Augusto & Stephano* regnantibus, de illis hostibus decerpta sunt perpende, profecto fortissimi bellatoris *Matthæi DEMBIENSKI*, virtutem, fælicitatem, rerum gestarum magnitudinem, & ardentissimam in patriam pietatem, muti etiam campi, sanguine hostium imbuti, arces à perduellibus vindicatæ, propugnacula seruata, fluuij superati, magnificè Tibi prædicabunt. Hic *Racoberium & Affelinum* dolosis in Cineribus oppida sepulta iacuerunt: illinc *Sancelinum, Orlinum, Bebelinum*: alia ex parte *Kiescinum, Lenuartum, Askaradum* propugnacula vel restaurata, vel hostibus erepta, *Diembienſiana* virtutis, gloriose præfixa & erecta habuerunt monumenta. Verum ego hæc omnia, vt per se magni-

fica & illustria, commodiori reseruo prædicanda tem-
poris opportunitati: illa me ad se se vocant, quæ pro-
pria sunt hodiernæ Solemnitatis inuitamenta, & quæ
Tuam excitent indolem generosam, ad prouidam vir-
tutum paternarum imitationem. Magnum enim est,
crede mihi Suauissime IOANNE S, diuini fauoris bo-
num, tantis maioribus, tantoque Patre nasci; sed maius
indole dignum illis videri; maximum denique in luce
Reip. virtutibus florere vigereque simillimis. Nam
ne videar palponem apud Te agere, sic (prout viri sa-
pientes sentiunt) accipe; hæc nominum & imaginum
claritas, quantacunque illa fuerit nisi per veram soli-
damque comprobetur virtutum imitationem, nostra
certè non est. Gloria nominis non nascendo quæri-
tur, sed viuendo. Nimirum, si per manus tradi claritas
posset, quàm clarus futurus esset Scipionis Africani fi-
lius, intelligis. Sed amare illum pater potuit, illustrare
non potuit: infinitam suæ lucis Ecclipsim passus in fi-
lio. Ingentes certè diuitiæ, possessiones, facultates,
cæteraque fortunæ bona fluxa sunt, & euanida; sola
virtus æterna & immortalis habetur: quæ (*vt ait Tul-
lius*) in tempestate sæua quæta est, & lucet in tenebris,
& pulsa loco manet tamen, atq; hæret in patria, splen-
detque per se semper, neque alienis vnquam sordibus
obsolescit. Quare Tuo fixa semper maneant hæreant-
que in animo illustrium Maiorum Tuorum Magnifici-
que Parentis virtutes meritaque, in Patriam & Eccle-
siam

fiam Christi pulcherrima & maxima, vt verum Te *Dem-
bienſciana* Gentis hæredem poſteritati comprobēs. Po-
ſteritas Tibi ſit in oculis Magnanime IOANNES,
cui Tuis de moribus, & de rebus geſtis, ſine fūco, ſine
ſimulatione, liberrimum iudicium relictum eſt. Non
equidem delinques in Patriæ bonum, ſi Tibi in mente
bona meritorum fama, in pectore hæſerit æternitas, &
huius author Deus. Sic omni æuo præſtantiffimi He-
roes Tui fecerunt, qui magnitudinem meritorum ma-
gnificentia, magnificentiam vera pietate metiebantur.
Hoc illis ex fonte ampliſſima bona promanarunt: Dei
imprimis Opt: Max: gratia ſingularis, atq; benignitas,
vitæ ſalus, agrorum fertilitas, rerum agendarum proſpe-
ritas, fama, decus, immortalitas. Hac virtute toties, vi-
tam ſupra humanam conditionem erexerunt, quoties
non luxu, non faſtu, non proteruiâ; ſed Comitæte, be-
neſcientia, fortitudine certarunt: quoties magnitudinē
animi manſuetudine, rigorem Juſtitie æquitæte, rerum
abundantiam moderatione temperarunt: hac virtute
in anxietatibus ſolatium, in rebus ſecundis decus, in
pertinacibus fortunæ iniurijs perſugium inuenerunt;
hac denique virtute omnia pulcherrima conciliarunt
ſibi & animi & corporis (quæ quidem à viris Illuſtribus
haberi poſſunt) ornamenta. Quid hac hæreditate ſan-
ctius, quid excellentius, quid illuſtrius cogitari poteſt?
quam qui fuerint conſecuti, non calamitatum tempe-
ſtates grauiter moleſteque ferrent, non ampliſſimo vir-

ris proemio, apud seram posteritatem carebunt, gloria.
quæ breuitatem vitæ posteritatis memoria consolatur:
quæ efficit vt absentes adsumus, mortui viuamus, & cu-
ius deniq; gradibus homines in Cælum videntur ascen-
dere. Hanc hæreditatem Tibi Generose IOANNES
Magnificus Tuus Parens ab Auis & Atauis deductam, &
acceptam, ingenuis præceptis instillat, exemplis docet,
auctoritate promouet. Dati enim sunt Tibi, beneficio
Illustrium Parentum, generosi à natura virtutis igni-
culi, qui si adoleuerint in Te, magnum bonæ famæ splē-
dorem & generi amplissimo, & Tibimet ipsi comparā-
bunt. Hoc Tuus amæno tinctus rubore pollicetur vul-
tus, hoc patrius fulgor oculorum, hoc frons rotundi-
tate quadrata, supercilia venusta, labia florida, auricu-
læ breues ingenium solers notantes, hoc deniq; tota li-
neamentorum compositio, non incertis probare vider-
tur argumentis. Ipsa verò quàm diligens, quàm inge-
nua, quàm grauis educatio est, quàm vigilantissimis
semper monitoribus occupata? Noli vocis nonnun-
quam asperioris obstupescere rigorem, paternus est. Pi-
ca quidem plumis insternit nidum, vt pulli mollius cu-
bent; sed Aquila generosa spinis obarmat, vt altius vo-
lent. Qui inter fomenta titillationesq; repuerunt, illos
tandem leuissimus flatûs auræ prosternit, frigus adstrin-
git, dissoluit æstus, & eneruat. Degeneres Sarmatæ nun-
quam cum rigidis Scythis in acie, sæpius cum ingenti-
bus Scyphis, in gynæceo certabunt. Tempestiue igitur para-

tur para Te luci, para Reip. theatro, para Ciuum Con-
spectui, para gloriæ: atq; adeò memento Vielopolscia-
nam magnificentiam, & splendorem, robore *Dembien-
scianæ* magnanimitatis tueri. Vtrumq; Tuum hæredi-
tarium bonum est, & (quod ego magnopere desidero)
si uti noueris, Tuum decus immortale. Vides, & agno-
scis quanta sit auctoritas Magnifici Tui Parentis, inter
omnes omnium hominum ordines, quos Sarmaticus
orbis continet: consideras labores grauissimos, curas
sollicitudinesq; maximas, vigilias, contentionesq; acer-
rimas, consilia nobilissima, pro communi Reip. bono
promouendo: perpendis tot vias, tot itinera, tot sum-
ptus, quos ille toties impendit Iudex æquissimus in A-
reopago Sarmatico deputatus: hæc omnia Te mouere
& excitare debent, vt velut alter Iulus, per vestigia Ma-
gnanimi *Æneæ* passibus olim æquis insistas. Quantã
ille propter Te tuumq; in bonis literis profectum colue-
rit humanitatẽ, quantam liberalitatem & munificen-
tiam exercuerit, vel ista præsentis festi Solennitas ma-
gnificè comprobauit. Nimirum Tuus Præceptor fa-
uentissimus, tantum gratiæ, tantum beneficiorum lu-
cratus est, apud pium, & verè Magnificum Tuum Pa-
rentem, quantum vix vnquam optare potuit, sperauit
certe nunquam. Iam tandem iura silent, prudenti consi-
lio temperata; lites officiosa charitate compositæ con-
ticescunt. Recognoscit Lycæum Sarmatium simul in-
no Professore prosperum laborum successum, & in be-

nefactore beneficentissimo, magnificam liberalitatem
recognoscit. At Tu qui intimorum maximè particeps
es secretorum Domus Tuæ, recognoscis prouidam Pa-
tris Tui liberalitatem; & in acceptis refers, munificen-
tissimæ Matronæ, piæ olim memoriæ *Constantiæ Bu-
żyńska* de Mirow, Proauia Tuæ, quæ Sacerdotem mo-
ribus, ætate, eruditione grauissimum Rñdum. P. *Seba-
stianum NV CERINVM*, gratia singulari fouit, be-
neficijs erexit, in conspectum hominum produxit, bi-
bliotheca clarissimis authorib⁹ refertissima, omniq; su-
pellectili domestica, ornauit & instruxit, in exteris in-
super nationes sumptibus expediuit. Hic est ille NV-
CERINVS Nestor Sarmaticus, & alter Phænix; hic
est ille NV CERINVS: *Mellitissimus innocentiorum,*

*Prudentissimus eloquentiorum
Oratorum; & amor tuus, tuumq;
Inter delitium laboriosas
Musas: fonte sacro leuauit, qui te &
Permulsit docili admonitione
Ætatem teneram Tuam benignè.*

Vt Tu præclarè Tuis tristibus Phaleucis, quos in fune-
re illius, emisisti in lucem, meministi. At nisi tam libe-
ralem & munificam Matronam diuinitus sibi datam,
NV CERINVS habuisset; Ecclesia Theologo, Ca-
thedra Doctore, populus tam pio, tamq; disertio Ora-
tore caruisset Nucérino. Facile erumpit in lucem &
conspectum hominum, benè paratum naturâ ingenium,
quod

quod excellentibus beneficijs Mæcenatum excitatur
& erigitur: quibus tamen si destituatur, primo vix hu-
mi serpit, deinde situ & squallore obruitur, tandem e-
gestate sepultum, in tenebris iacet, languet, evanescit.
Nimirum tenera admodum sunt eruditorum virorum
ingenia, vel ita mollia & delicata, vt nisi in summis fa-
uoribus Principum vigere non possint: vel denique
eiusmodi, vt nullum sui contemptum ferre posse vide-
antur. Senserunt hoc omnes omnium sæculorum Viri
sapientes, qui vel liberalitatem Mæcenatum suorum
disertissimè probabant, vel ingrata diuitum tenacitatē
penitus improbabant. Summæ quidā auctoritatis Vir,
aliquando interrogatus, quid nautis opus esset, respon-
dit ventis; rursus quid colonis opus esset, respondit
pluuia; tandem quid Illustribus Viris, respondit Orato-
ribus & Pœtis. Et meritò mea quidem sententia.
Nam vt nautas & colonos omittā, quo per immortalem
Deum, auctoritate graues, meritis conspicui, virtute
præstantes in libera Rep. Ciues indigere maximè pos-
sunt, nisi immortalitate: quam non pecunia, non po-
tentia, non rebus gestis comparare possunt, si fuerint
Oratorum vel Pœtarum auxilio destituti. Quot putas
extitisse Sarmatas domi militiæq. Clarissimos, quorum,
quia doctis Scriptoribus caruerint (antequam hoc ef-
fet Lycæum excitatum) nulla extat apud posteritatem
laus, neque memoria? At nunc quàm grauiter sæpe
gemit & fremit, & indignatur, laboriosa industria, quæ
ne apud

ne apud Amphictyonas quidem, iustam meretur approbationem: vbi Miriones minimè mites Philargiriâ, Pamphili cænodoxiâ laborant. Est hæc insita vis, Magnifico Tuo Parenti Generose Iuuenis, vt facili negotio bona ingenia dignoscere ac diligere, & languentia possit atque velit excitare. Vt enim simul ille Vir vultu Venerabilis, aspectu grauis, moribus & sapientia Spectabilis NV CER INVS, hunc Magnifico Tuo Parenti commendauit virum, subitò ita illum dilexit, vt etiam admiserit non in ædestantum suas, sed etiam in animum. Habuit enim sicuti meminisse Te arbitror, ille arbiter ingeniorum præstantissimus, per multa certissima non vulgaris Sapientiæ documenta; sed illud maximum atque singulare, quod ex lineamentorum faciei compositione, tacitè colligebat, quam virtuti iustam datuturus esset approbationem. Cùm præsertim neque grauitas morum cum vecordia cohæreat, neq. pulcher animus in deformi corpore conquiescat. Placuit igitur illi viro, sermo grauis & apertus, mens serena & sobria, vultus placidus, oculorum frontisque virilis conformatio, gestus, incessus, mores minimè suspitione notandi placuerunt. Quid plura? non solum illum dignum Præceptorem Tibi, sed etiam in beneficio susceptorem sibi designauit. Qui enim placuisset Venerando Patri, non potuit prudentissimo Tuo Parenti non placere. Hinc beneficia beneficijs cumulata, officia vltro citroq. collocata, fauor, gratia, candor indu-

industria probata & perspecta, ad hoc usque tempus integra & illæsa permanserunt. Equidem vera gratia nescit modum, ignorat pietas mensuram. Non alit beneficentiam propter nundinationem, non liberalitatem propter ostentationem exercet: non magis propter homines, quàm propter DEVM, ardentem promouet charitatem. DEVS equidem Opt: Max: eam mentem Magnifico Tuo Parenti inspirauit, & indidit, qui diligenter Pastorem gregi cogitauit, anxie quaesuit, fæliciter inuenit, liberaliter dotauit; citiusque illi beneficia contulit, quàm quisquam cogitauit. Ergo bonus piusque Præceptor Tuus, ita tanta tamque illustria beneficia recepit, vt esset coram Deo Sacerdos, & æternum obligatus Prædicator. Audiui enim toties illius illas voces, quas frequenter abreptus admiratione beneficiorum, identidem repetere solebat. Quicquid erat Tibi pretiosum Magnifice Mæcenas, mihi obtulisti, quia filium meæ curæ fideiq; credidisti: & simul cum Filio, charissima quæq; munera concessisti. Quicquid fortunæ meæ tenuitas desiderabat, abundè subministrasti: desiderium meum illustri fauore, gratia, pietate expleuisti: auctoritate fidem, humanitate spem, beneficijs omnium opinionem, & expectationem vicisti, superasti: totum denique Te Magnificè Benefactor, ad meas vitæ rationes augendas, & illustrandas effudisti. Quicquid rerum possideo Tuum est: quicquid habeo teneoque receptum est à Te. Quicquid

vicini vident, amici suspiciunt, hospites mirantur; quicquid ædificia, & ipsi parietes atque fundi continent, totum id Tu mihi sponte obtulisti, etiam non petenti. Obseruasti illud *Petri Aldobrandini* Cardinalis Symbolum, qui roganti amico, quodnam beneficium existimaret maximè gratum, illud quod non esset peti- tum, aut precibus extractum, respondit. Notasti prudentis esse benefactoris elogium, qui velut ille Eutro-
pius

Nil negat & se se vel non poscentibus offert.

Sciuiſti regia, & exemplo Tuo expreſſiſti liberalitatis exempla, quæ æternis literarum monumentis celebrantur. Repetiſti è veteri memoria *Ludouici XI.* Francia Regis notandam vocem, qui in homines ſortis tenuioris, admodum beneficus & liberalis erat, quod horum precibus vitæ diuturnitatem conciliari ſibi conſideret. Propoſuiſti Tibi ad imitationem *Alphonſi* Regis Aragoniæ magnificentiam, atque pietatem, qui quod vltro non rogantibus beneficia conferret monitus ab amicis; Hercules etiam reſpondit, non rogatus laborantibus ſubuenire conſuevit. Principem autem in dando facilem eſſe oportere; cuius etiam liberalitas cum Sole poſſit comparari, quod is non rogatus omnia radijs ſuis illuſtret. Ergo viue felix, viue fortunatus, & longiſſimos in annos ſanûs, & incolumis, vige & vale: qui in me *Aldobrandinos, Ludouicos, Alphonſos,* beneficijs Tuis expreſſiſti. Hæc illius mens, hæ voces,

ces, hæc vota, hæc desideria fuerunt repetita toties & expressa. Nefas enim esset profectò, ut ubi aræ templa, campi, ædificia, recentibus beneficijs vocalia sunt, tantorum possessor bonorum obmutescat. Etenim cum omnibus virtutibus se affectum esse cupiât, tum nihil est quod malit, quàm se & gratum esse & videri. Et beneficium dare, & gratiam referre, per se res expectandæ sunt, & gloriosæ. *Equidem nihil tam proprium hominis existimo, (ait Tullius) quam non modo beneficio, sed etiam beneuolentiæ significatione alligari: nihil porro tam inhumanum, tam immane, tam ferum, quam committere, ut beneficio non dicam indignus, sed victus esse videare. Quanquam dissimilis est pecuniæ debitio & gratiæ. Nam qui pecuniam dissoluit, statim non habet id, quod reddidit: qui autem debet, æs retinet alienum: gratiam autem & qui refert, habet: & qui habet, in eo ipso, quod habet refert.* Sed & illud quod ait Mimus certissimum est. Beneficium accepit qui digno dedit. Erit igitur hoc Sacerdote & exortatore apud Deum præsentem, fælix Vestra Domus, fortunata Familia, beata cohors amicorum. Nam ita liberaliter, quam diuinitus consecutus est, sparget ubiq; benedictionem, ut in agris vbertas, in animis amœnitas, in corporibus salus & sanitas vigeat incorrupta. Quæ quidem beneficia cum agnoscamus, & gratulemur Vobis adesse singula, tum hoc anno superiori quo grauis afflixerat Poloniam annonæ sterilitas, in

agris paternis copiosam mirati sumus vbertatem. Satis liberaliter fœnus suum reddit Possessori tellus, qui munificentiam iustâ exercet in Sacerdotes : qui decimas propinat spontè, auget hilariter, exhibet libenter. Nimirû quo rarior hac tempestate virtus hæc est, eò inter sui cultores fœlicior : & quæ non solum iusto possessori, sed etiam posteritati, certam firmat spem, auget honorem, pollicetur beatitatem. Felices nimium decimas, quarû videlicet fructus, non in decennium perdurant, sed in omne sæculum prorogantur. Nouimus equidè, beneficio Sacrarum literarum, quam fortunatum habuerit Pater gentium *Abrahamus* tantæ pietatis successum: qui subito vt hostes vicit, spolia opima decerpfit, gratulationes Regum vicinorum audiuit, decimas *Melchisedecho* Sacerdoti sponte & alacriter obtulit & dicauit. At quis ille fuerit Sacerdos, (qui sine Patre sine Matre natus esse perhibetur) hætenus ignoramus omnes. Magnum equidem huiusce rei Sacramentû est, magnum mysteriû: atq. eiusmodi, quod homines humi strati & abiecti, penetrare nō possunt. Sudarunt in istius inuestigatione secreti, sancti & auctoritate graues viri : neq. tamè satis cohærétia sibi, monumētis literarû consecrarunt. Magna maiestas est (quos authores nominat D. Hieronymus) *Irenæi, Hippolyti, Eusebij Cesariensis, & Emiseni* : tum & *Apolinarij quòque, & Eustathij* quem primû vidit Episcopum Ecclesia Antiochena. Horum iudicium magno consensu sequuntur cuncti eruditi. Etsi enim suas singuli

guli prodant rationes; tamen diuersis argumentationibus conuenerunt in vnum. Quid verò hac de re D. *Athanasius* affirmet, vnicuiq. liberum iudicium relictum est. Sed neq. Liber *Euagrii* missus ad D. Hieronymum quibusdam eruditis & diuino Spiritu plenis viris, contemnendus videtur: quo is docet *Melchisedecum* non hominem ex hominibus genitum, sed diuiniore naturæ fuisse, maioremque homine, ac digniorem certe, qui tanto benedixit Patriarchæ. Enimvero ita res est. Profligauerat prælio Reges impios *Abrahamus*, & iam victrices reducebat copias. Ecce verò tum temporis itinere obuium se illi tulit, qui semper præsens adfuit Filius Dei, specie humana, habitu Sacerdotis Regisque indutus: eiusque animum faustis vocibus ad omnia ingentia erexit. Etiam panem vinumque fessio dedit, ne quid hac quoque parte desideraret ille Principum debellator. Cognouit quod sub imagine latebat, coluitque mente *Abrahamus* mysterium. Statimque Messiae, Summo Regi Sacerdotique, quem mortalibus olim datum iri intelligebat, præsentem præsens munera decimasque obtulit gratissimas. Ecquid causæ obsecro est, cur hunc Iustitiæ & Pacis Regem (quod Melchisedechi nomen, iuxta quorundam clarissimorum authorum interpretationem denuntiat) non credamus fuisse eundem illum Filium Dei, qui postea ad quercum *Mamre*, duobus comitatus socijs, *Abrahamo* apparuit, cibumque cum illo sumpsit, adfuit vna in vniuersis ædibus, ac denique

collocutus cum illo est? Illa enim pietas, illa liberalitas illa grati animi significatio Abrahami, tanti fuit momenti, vt eam Filius Dei præoccuparet aditu suo, præfensque adornaret. Quorsum hæc Generose DEMBIENSKI? Nimirum vt intelligas felicem esse quæ cum Deo glorioso cohæret nundationem, felicem liberalitatē, quæ Dei gratia fideliter suscipitur & exercetur: quæ Tui Perillustris Genitoris virtus est singularis. Quæ cum ita sint, gaude tantis, tamque excellentibus Magnifici Tui Parentis virtutibus, & quas Tibi ad imitationem hæreditarias proposuisti dotes, cum per ætatem licuerit maturiorem exemplo effinge; daque operam quam diligentissimam, vt Gentem Tuam opibus firmam, egregijs rebus gestis florentem, gloria abundantem, Tuis etiam meritorum accessionibus olim reddas auctiorem: vt quemadmodum Magnificus Pater Tuus pietate Abrahamum, ita Tu virtutis imitatione, & quæ inde sequitur Diuina benedictione, exprimas Isaacum. Vale mi Optime IOANNES, & cogita Te esse *Dembienſcium*, id est Sarmaticæ Reip. Ciuē, Regni Pol. incolam, hæredem veræ libertatis: quod quidem eò studiosius feceris, si *Iconem Heroicæ Virtutis* inspexeris, quem Tibi Maiores Tui omnibus virtutibus ornatissimi ad imitationem proposuerunt: quem Magnif. Genitor Tuus, exemplis illustribus effinxit atq; comprobauit. Tanta enim fuit semper *Dembienſcia* virtus atq; fama, tanta Tuæ gentis gloria, vt etiam Reip. gubernaculis

naculis fuerint admoti Maiores, Regiūq; locū tenuerint;
quod in IACOBO DEMBIENSCIO Viro me-
ritis, eloquentia, auctoritate Clarissimo, Regni Cancel-
lario & Capit: Cracouiē. regnante Casimiro Iagello-
nide, literarum monumentis comprobatum est. Quic-
quid igitur in vita cogitaueris prudēter; quicquid fece-
ris laudabiliter, quicquid ex literarum progressionibus
laboriosè cōparaueris Tibi emolumētū, totum id ad Dēi
Opt: Max: gloriam, Ecclesiæ decus, Patriæ præsidium
conuertas. Nos verò Minores in Lycæo Iagelloniano
Quirites, Numen sanctiss. supplices exorabimus, vt fæ-
lix, saluus, incolumis, ad Catholicæ Religionis orna-
mentum, Nobilissimæ Gentis incrementum, Mag:
Genitoris Tui & Illustrium Amicorum solatium,
longè maximum, in luce Reip. crescas, vi-
geas, efflorescas. DIXI.





VOTVM SACRVM

A D

Excellentiss. & Adm. Rndum D.

D. MATTHEVM CASIMIRVM
W O I A S Z O W I C
Neomyſtam.

*D. Hieronymus de vita Clericorum
ad Nepotianum.*

CLericus qui Chriſtiferuit Eccleſiæ, interpretur ^{te} primo vocabulum ſuum, & nominis definitione prolata, nitatur eſſe quod dicitur. Si enim κληρ Græcè, ſors Latinè appellatur: propterea vocantur Clerici, vel quia de ſorte ſunt Domini, vel quia ipſe Dominus ſors, id eſt pars Clericorum eſt. Qui autem vel ipſe pars Domini eſt, vel Dominum partem habet, talem ſe exhibere debet, vt & ipſe poſſideat Dominum, & poſſideatur à Domino.

DVM Tibi ſacra Cohors ſacros gratatur honores
Hæc Voiaſſeui percipe verba mea,
Sit felix & fauſta Tibi quæ Numine dextro
Mutata eſt vitæ ſors hodierna Tuæ.

Ha c

Hac iter est calo. Sacram contingere metam
Qui velit, hunc alia non licet ire via.
Ergo iam dubia spes, & fortuna, valebunt,
Cum Dominus Tibi pars hereditatis erit,
Illa Deo placuit, placuit Cleroq; fauenti
Qui sancta Numen Relligione colit.
O nimum felix, vitam concorditer aqvis
Cui sacer ordo piam dirigit auspiciis:
Felix cui pariter Deus atq; Ecclesia fauit
Ille nouo dono, calculo at illa probo.
O qui nunc epulis animum populumq; Sacerdos
Pascis, nos quoq; nunc per Tua vota iuua.
Per Tua vota iuua, suspirat turba piorum
Hæc verba ingeminans, per Tua vota iuua.
Per Tua vota iuua miseros quoq; peccatores,
Heu peccatores per Tua vota iuua.
Per Tua vota iuua, dū ferrum adamantaq; frangat
Vox Tua, & elidat vi valida omne nefas!
Sic anima obturata foris, velut ariete crebro
Icta, diu tandem cedet aperta Deo:
Mentis & hæc cautes in agrum conuersa feracem
Cultura referet sænora grata Tue.
Per Tua vota iuua, iuuenili in flore IO ANNEM
Qui Patris est pullus, sed Tibi discipulus.
Per Tua vota iuua Dominum, Dominamq; fauentē,
Et gnatam ingenuam per Tua vota iuua.

Ergo

Ergo magis, magis vsq³ tona diuine Sacerdos,
Cantoresq³ Tuos per Tua vota iuuua.
Nā semper velut vrna liquens, pertusa, & inanis,
Sicca, & inexpleta, & nil solidi intus, alunt.
Quod faciunt tumidam ob deiecta mentis Orexim
Sapius ut noxas immemores glomerent.
Christe tuarum ouium PAN vere, piissime Christe,
Pro grege cui vitam ponere dulce fuit,
Suscipe quæ supplex tibi, vota refundit ad aras
Feruenti famulus pectore & ore pius.
Ille Tibi niueam casto cum corpore mentem
Ille Tibi vitam sacrat in obsequium,
Pro quibus officiis, & sancti pignore amoris
PANE Tuo Mystam, PAN bone, pasce tuum.
Pascet at ille gregem vigil atq³ arcebit ouili
Prædatorem vrsū, carniuorumq³ lupum.
Tu bone Pastorem Pastor benedixeris ipsum,
Pastori atq³ gregi tu modo Christe faue.
Tu modo Christe faue, multam hospitibusq³ salutem
Largire, & Ciues feceris incolumes,
Da pacem populo, bellumq³ famemq³ repelle,
Et pestem rigidam Styx quam inimica vomit.
Nos Tibi sat sani grates soluemus amenas
Et dabimus gratum voce sonante melos.

BIBLIOTH. ORIG.



JAGELLONICAE



